

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Te faaroo nei matou i te haaputupu-hua-raa o Iseraela, e i te faaho'iraa mai o na opu tino ahuru i moe ra. E e faatiahia o Ziona i nia i teie nei fenua (i Amerika). E e parahi tino mai hoi te Mesia ei arii i nia iho i te fenua nei. E e faapîhia hoi te fenua nei, e e faaho'ihia mai te hanahana o to'na huru paradaiso ra.”

Nu. 11.

Novema, 1913.

Mat. 6.

Te Fenua A'ia o Iosepha.

[A taio tatou i te Bibilia, ua ite tatou i te tahi mau peu no te Feia faaroo i te anotau tahito. Teie te tahi peu no ratou, oia hoi, i mua iti a'e i to ratou poheraa, ua haaputupu ratou i ta ratou huaai, oia hoi, ta ratou mau tamarii tamaroa, e i taua taime ihora, ua haamaitai atu ia ratou. E ua riro te tahi pae no taua mau parau haamaitairaa ra ei mau tohu.

E hi'o tatou i te tahi na haamaitairaa e piti, i papaihia i roto i te Bibilia, mai te faaitehia mai i roto i Genese, te pene 49. Te na ô mai nei te irava hoê: “Ua tii atura Iakoba i te tamarii tamaroa na'na ra, na ô atura, A haaputupu mai, ia faaite atu vau ia outou i te mau mea e roohia mai ai outou, ia tae i te mau mahana hopea ra.” E ua haamata o Iakoba, o tei parauhia Iseraela e te Atua, i te haamaitai ia Reubena, te matahiapo, e haamaitai atura oia i ta'na na tamarii tamaroa e tae roa'e ia Beniamina, te hopea ra ia.

E hi'opoa tatou i te haamaitairaa i topahia i nia iho i te upoo o Iosepha, o tei taa ê i rotopu i to'na mau taeae, no te mea ua hoo atu ratou ia'na i te mau taata hoo tao'a, e hopoi atura ratou ia'na ia tae atu ai i Aiphiti. E i te taime ihora no teie nei haamaitairaa, ua parahi o Iakoba e ta'na utuafare i reira.

"O Iosepha ra, e ohi hotu ia, e ohi hotu i te pu o te pape ra; o tei toro to'na amaa na nia iho i te aua ra: 23 rahi noâ to'na mauui i te feia te'a, o tei te'a mai ia'na, e te tairoiro hoi ia'na; 24 te vai tia ra ta'na fana te etaetâ te etaeta, e te puai ra ta'na rima i te mana o te Atua mana o Iakoba ra, no reira mai te tia mamoe ra, te to'a pu o Iseraela ra: 25 no te Atua o to metua tane ra, o te Atua e tauturu mai ia oe ra, no te Manahope ra, o tei haamaitai mai ai ia oe ra, i te mau maitai o te ra'i i nia ra, e te mau maitai o te moana e vai noa i raro nei, e te mau maitai o te û e to te opu: 26 te mau maitai o to metua tane e hau ia i te mau maitai o tau mau tupuna ra, e tae noa'tu i te otia o te mau aivi vairaa mure ore ra, i vai hua na i nia iho i te upoo o Iosepha, e nia iho i te tupuai o tei taa ê i rotopu i to'na ra mau tuaana!"

Na roto i teie nei na irava ua ite tatou e, e ohi hotu maitai Iosepha, e e mea ê atu ia te fenua a'ia o Iosepha i to to'na mau tupuna, no te mea ua toro to'na amaa na nia iho i te aua ra, e te aua ra, o te miti ia. E ua hau i te maitai to'na fenua i te fenua o to'na mau tupuna. O Kanaana ia te fenua o to'na mau tupuna. Teihea te fenua a'ia o Iosepha, e eaha to'na huru?

O Mose ia, tei tauturu mai ia tatou i te ite i taua mea ra, no te mea e piti tenetere e tiahapa i muri mai, e i mua rii i to'na poheraa, ua haamaitai oia i te mau tamarii a Iseraela, e ua faaite mai oia i te huru no te fenua a'ia o Iosepha:

"E na ô a'era oia ia Iosepha ra, Ia haamaitaihia to'na fenua e Iehova, i te maitai ra i te hau no te ra'i mai, e to te hohonu i hohorahia i raro ra; 14 i te mau mea maitatai i

paari i te mahana ra, e te maa maitatai o te mau marama ra; 15 e te mau mea maitatai no te mau mou'a tahito ra, e te mau mea maitatai o te mau aivi e tia i te vairaa e a muri noa'tura; 16 e te mau mea maitatai o te fenua e to roto atoa ia'na ra, e ia iri mai te aroha no'na, e no tei parahi i te pu aihere, i nia i te upoo o Iosepha; i nia iho i te tupuai o tei taa ê i to'na ra mau taeae. 17 E au to'na unauna i te puaa-toro pa'e maitai roa ra; e to'na tara mai te tara o reema ra; e tui oia i te taata i te reira, e tae noa'tu i te hopea o te fenua ra; o te mau auahuru o te tausani te reira o Epheraima, o te mau tausani hoi te reira o Manase ra.'" Deuteronomi 33: 13-17.

Te nana, na roto i teie na haamaitairaa e piti, ua ite tatou e, o Amerika ia te fenua a'ia o Iosepha. E mea memene teie nei ao, e mai te mea e faarue tatou i te fenua Kanaana, e haere i te vahi atea roa, noa'tu mai te mea e haere i te pae i te hitia o te râ, e aore râ i te pae i te tooa o te râ, e tae atu tatou i te fenua Amerika, e ua au ia i te mau aivi vairaa mure ore ra. E te mau maitai o te ra'i i nia ra, eaha ia, maori râ te parau heheu a te Atua? Oia ia. Ua ite tatou, mai tei faaitehia mai e te Buka a Moromona, ua farii pinepine mai te mau peropheta, o tei parahi i Amerika i te tau matamua, i te parau heheu, e ua na reirahia i teie nei iho â anatau atoa hoi.

E no te hau e te pape i hohorahia i raro ra, e te mahana, e te marama, e tupu ai, e e paari ai te maa: te sitona, te umara, e te hotu raau, etc. E o vai te fenua tei hau i te maitai i te mau fenua atoa o te ao nei i te faaapuraa i te maa? O Amerika ia. E aita'tu te hoê fenua mai ia Amerika te huru i te mau mea maitatai no te mou'a tahito ra, oia hoi, te auro, e te ario, e te auri, e te arahu, etc.

Ua tupu anei teie nei na haamaitairaa? Ua tae atu anei te huaai a Iosepha i te fenua o Iosepha? Teie te pahonuraa, E, oia mau, ua tae atura ratou. Teie te huru no to ratou haereraa, mai te parau i papaihia i roto i te Buka a

Moromona, no te mea te vai nei to ratou papaa parau i roto i taua buka ihora; oia hoi: E ono hanere matahiti i mua i te fanauraa mai o Iesu Mesia, ua mou Ierusalema. Ua faaite atu te Atua i te hoê taata, o Lehi to'na i'oa, eita e mahia e mou ai taua oire ihora; e ua faauehia oia ia rave i ta'na utuafare, e i te hoê atu â taata, o Isemaela, e ta'na utuafare, e faarue i to ratou fenua, e ua na reira ratou.

Ua haere noa ratou na roto i te medebara i na matahiti e vau, e ia tae atura ratou i te hiti o te Miti Arabia, hamani ihora ratou i te hoê pahi, mai tei faaitehia e te Atua ia Nephi. E oti maitai ihora, ua haere ratou i raro i te miti, e ua puhia-noa-hia e te mata'i i te paeau ia tae atu ai i te fenua i parauhia. Ei reira ua haamaitahia ratou i te û e to te opu, e ua tupu mau te haamaitairaa ta Iakoba i topa i nia iho i te upoo no Epheraima, e no Manase. Genese 48: 12-20.

E mau huaai ia o Lehi e ta'na iho mau huaai na vai? Teie te pahonuraa, oia hoi, te huaai ia ratou na Iosepha, te tamaiti a Iakoba, na roto i te utuafare a Manase; e o Isemaela e ta'na utuafare, no roto mai ia ratou i te utuafare a Epheraima. E na tamarii ia o Manase raua o Epheraima a Iosepha ra.

—IRA HAERA.

“E teie nei, ua hinaaro vau ia riro outou ei feia hae-haa, e te auraro, e te mārû, e ei feia a'o-ohie-hia; e te î i te faaoromai, e te hitahita ore; e te au maitai i te mau mea atoa; e te itoitoe i te haapaoraa i te mau faaue a te Atua i te mau mahana atoa ra; i te aniraa i te mau mea atoa e au ia outou na, i ta te varua e ta te tino atoa hoi; e i te haamaitairaa i te Atua i te mau mea atoa ta outou e farii ra, ma te feaa ore.

“Ia tapea maite i te faaroo, e te tiaï, e te aroha, ei reira e rahi ai outou i te ohipa maitatai ma te feaa ore.” Buka a Moromona, Alama 7: 23, 24.

Te Parau Tuatapapa no Iosepha Semita.

(Tuatiraa.)

PENE XXXVIII.

Matahiti 1844.

Te opuaraa ino o te hoê taata taiva. Te neneiraa e te faahaparaa i te hoê vea, i parauhia "Te Faaite Navu." Ta Iosepha a'oraa hopea i te Feia Mo'a. Faarue atura oia raua o Haeramu i Navu. Te ho'iraa mai i te oire. "Te haere nei au mai te hoê pinia mamoe i te tupairaa."

UA tupu te peapea rahi roa i te 7 no Tiunu, 1844, a neneihia'i te hoê vea, i parauhia "Te Faaite Navu". Ua neneihia teie nei vea e te tahi na taata taiva, e o Iosepha raua o Haeramu ia tei faaino-puai-hia mai. I taua mahana ihora, ua haere maira o Robeta Fotera i te Peropheta, e ani maira ia paraparau ia Iosepha, ia'na'na'e, mai te parau e, ua hinaaro oia ia haere faahou mai i roto i te Ekalesia; aita râ Iosepha i faatia, maori râ tei reira'toa te tahi mau ite. A paraparau noa'i raua te tahi i te tahi, ui atura Iosepha ia'na e, "Eaha tera i hunahia i raro a'e i to oe ahu?" Ua fa'i maira Fotera e, o te reira hoi ia ta'na pupuhitereumu, e muri iti a'era, faarue atura oia i te fare, mai te parau e, e haere faahou mai oia ra. Aore roa râ oia i na reira. Ua itea-vave-hia e, i opua na hoi oia i te taparahi ia Iosepha.

E toru mahana i muri iho i te neneiraa i "Te Faaite Navu", ua haapao te mau taata faatere no taua oire ra i te hoê apooraa, e faahapa ihora ratou i teie nei vea ei mea ino, e te faufaa ore, e ua faauehia o Ioane P. Gerene, mutoi, ia faaore i te reira. Ua haere atura oia ma te tahi mau tau-turu, e iriti maira ratou i te matini neneiraa parau, e haapararî ihora, e haapue noa ihora i te mau leta auri. Ua papai Iosepha, tavana oire, i te hoê parau, i te faaiteraa'tu i te tumu no taua ohipa ra, mai te faaite atu e, ua na reirahia ei parururaa ia ratou iho.

Ua haapeepée noa'tura teie nei na taata taiva i Karatage, e faaite atura i tei ravehia. Ua tonohia maira o Davida Betiwota, mutoi, ia tapea ia Iosepha raua o Haeramu e i te mau taata tei haamou i "Te Faaite Navu". Ua faatia maira te mutoi ia faaroohia ta Iosepha ma parau i mua i te haavâraa oire no Navu, e e hi'opoahia'era ratou, ua faatiamâhia ihora.

Ua haponu atura Iosepha i te hoê parau faaiteraa ia Forada, tavana, mai te faaite atu i te mau mea'toa i ravehia, e faatia ihora oia ia haere i Sipiringafela, te oire rahi no Ilinoi, e haavâhia. Ua haere Iosepha ma i mua ia Daniela H. Wele, o tei ore e melo no te Ekalesia i reira, e e oti roa'era te haavâraa, faatiamâ-faahou-hia ihora ratou.

I te reira iho â mahana, ua haamata te mau enemi i te haaputuputu, e ua hanere tei haere maira i teie pae atu no te anavai ra Misisipi e tauturu i taua mau ohipa faufau ra. O Iosepha ia te generala rahi no te Nu'u no Navu, e faaue atura oia i to'na ra mau faehau ia rave i ta ratou mau mauhaa tama'i, e ia paruru i to te oire. Ua tia'era oia i nia i te mahora, i ahuhia i to'na ahu faehau, e a'o atura oia i to'na ra mau faehau, e te Feia Mo'a paatoa. O te reira ia ta'na a'oraa hopea i te taatoaraa no te Feia Mo'a. A parau atu ai oia, unuhi ihora i ta'na 'o'e, e faatoro a'era i to'na ra rima i nia, ua na ô atura oia i te mau taata: "Te pii atu nei au i te Atua e te mau melahi ia ite mai ia'u, i te unuhi-raa i ta'u 'o'e, ma te opuaraa papu e te aueue ore e, e noaa i teie feia te mau mea tia, e e paruruhia ratou i te mau pūpū enemi, e aore râ e haamaniihia to'u toto mai i te pape i te huru, e e tuuhia to'u tino nei i roto i te fenua."

E toru mahana i muri a'e i ta Iosepha faaueraa i to te Nu'u no Navu ia rave i ta ratou mau mauhaa tama'i, ua haere maira o Forada, tavana, i te oire ra i Karatage, e haponu vave atura oia i te tahi parau ia Iosepha, mai te ani atu ia'na ia tonu mai i te hoê tomita no te mau taata turatura no Navu ia'na. Ua tonohia Ioane Tela raua o Ioane M.

Benahisela ia faaite atu i te huru no te mau mea'toa i te tavana. Ua paraparau oia ia raua, e taio a'era i ta raua mau parau faaiteraa i mua i te hoê pŭpŭ enemi no te Ekalesia, o tei haafîfi noa maira ia'na ma te mau tapu e te parau haamăta'u. Ua faaite papu te tavana e, e taata paruparu oia, e aita ona i hinaaro ia haapao i ta te ture fenua ra. Ia faaroo Iosepha raua o Haeramu i te reira, ua ite raua e, aita'tu ravea ia faaora ia Navu, maori râ e haere ê atu raua.

I te 22 no Tiunu, i te pô, a tahe puai noa'i te roimata no ratou, vaiiho ihora Iosepha ratou o Haeramu, e o Viliadi Ritedi i to ratou mau utuafare, e faarue atura ia Navu. Ua tere ratou i tera pae mai no te anavai ra Misisipi na nia i te hoê boti nainai e te ino, e na Orina P. Rokawelee i hōe i te boti. E poipoi a'era, ua haamata itoito ratou i te faaineine no to ratou haereraa'tu i te tooa o te râ, e opua ihora ratou i te haere i te mau Mou'a Ofai ra.

A faaineine noa'i ratou, ua tae maira te tahi parau, no ô mai ia Ema, e te tahi mau faahua hoa no ratou, i te aniraa mai ia Iosepha ia ho'i atu i Navu, mai te parau e, e taata măta'u oia, e te horo ê atura oia i te ati. Aita i tia ia Iosepha raua o Haeramu ia faaoromai i te reira huru pariraa, e ho'i atura ratou i Navu, e a haere atu ai ratou i reira, ua parau atura Iosepha e, "Te ho'i atu nei tatou e tupaihia." Ua pahono maira Haeramu e, "Ia ora tatou, e aore râ ia pohe, e faaoromai tatou i to tatou huru."

I te poipoi i muri iho, haere atura Iosepha, e e hoê ahuru ma hitu taata, o tei faaue ia tapeahia, i te oire ra i Karatage. A haere atu ai ratou i pihaiiho i te hiero, hi'o a'era Iosepha i taua fare mo'a ra, e i te oire atoa, e parau atura oia ma te re'o mărû i to'na ra mau hoa e, "O teie hoi ia te vahi hau ê i te nehenehe, e o teie hoi ia te feia hau ê i te maitai e te parau-tia i raro a'e i te ra'i ra. Aita hoi ratou i ite i te mau ati e te peapea i mua ia ratou ra." Ua farerei ratou ia Duna, raatira, e e ono ahuru faehau no Karatage, o tei tonohia e Forada, tavana, ia tapea i te mau

mauhaa tama'i na to te Nuu no Navu. Tei ia Duna te parau faaueraa, e papai ihora Iosepha, generala rahi no taua nuu ra, i to'na i'oa i nia iho i taua parau ra. E oti ihora teie nei ohipa, na ô atura Iosepha i te mau taata i reira:

“Te haere atu nei au mai te hoê pinia mamoe i te tupairaa, ua mahoru râ vau mai te hoê poipoi nehenehe. Aore roa'tu ei hara i tau aau i te Atua, e i te taata'toa nei. Ia taparahi ratou ia'u, e pohe au ei taata hara ore, e e pii hoi to'u toto mai te fenua mai no te tahoo, e e parauhia te parau e, 'Ua taparahi-noa-hia oia.' ”

Ua mätä'u o Duna ia haere atu i Navu e rave i taua ohipa ino ra, e ani maira oia ia Iosepha ia haere i pihaiiho ia'na, ia ore oia e roohia i te peapea. Ua feaa noâ te mau taeae i te horoa mai i ta ratou mau mauhaa tama'i, haapao ihora ratou i ta Iosepha faaue. Na te hau ia teie nei mau mauhaa tama'i, e ua tia noâ i te ture ta te tavana tapearaa i taua mau mea ra, e taata mätä'u rahi ia ia na reira oia. Na to ratou haapaoraa i faaite i to ratou hinaaro ia haapao i te ture. Ua parau faahou atura Iosepha raua o Haeramu i te mau taata'toa i reira e, Ia ora na, e faarue ê atura raua ia Navu e a muri noa'tu.

—OLE PETESONA.

(E tuatihia mai teie parau.)



TE FEIA MO'A I TE FAAERAA I ROTO I TE MEDEBARA RA.

Parau Apî i Tahiti.

I TE 5 no Novema nei, ua tae mai i Papeete nei te hoê boti hôe, e tei roto i taua boti ra e tootoru taata, o tei faatere i taua boti e piti tausani, e pae hanere maile. Mai tera te huru o to ratou tere ati: Tei nia iho ratou i te hoê pahi tira maha faauta raau, mai Amerika mai; e hoê milioni pie raau tei nia iho i taua pahi ra. E tere maitai to ratou e tae roa i te Mahana Maa, i te 13 no Tiunu, i te hora pae, ei reira ihora, ua roohia ratou i te hoê vero ino rahi roa, e ua faarue-roa-hia te mau ie, e ua huru ino roa te pahi. Ua tamau noa te mata'i e te miti rahi, e tae roa i te ahiahi Sabati, e ua î roa te pahi i te miti, e aita hoi e ravea i toe. Ua huru tomo roa te pahi, e te vai noa ra te miti e toru avae te teitei i nia i te tahua o te pahi, e aita hoi e ravea ia paumu i te pahi, e no reira ua haere ana'e ratou i nia i te boti no te pahi: e hoê ahuru e ma hoê ratou: te raatira e te mau mataro.

Aita rea te maa i roaa, no te mea ua î roa te pahi i te miti: te tahi mau punu puaatoro rii, e te punu û, e te tahi punu faraoa pâpâ, tirara ia. I te hora 3 i te ahiahi no te Sabati, ua faarue ratou i te pahi, e e 9000 maile te atea te fenua ra o Rapanui, e ua tamata ratou ia tae atu i taua fenua ra, e e 9 mahana i muri iho, ua tapae ratou i reira. E maoro roa ratou i reira, oia hoi e 105 mahana, e aita hoi ratou i farerei i te hoê pahi, no reira ua faarue te raatira, e na mataro e toopiti, i taua fenua ra, e ua imi ratou i te fenua ra o Mareva. E area hohonu roa taua fenua ra, oia hoi e 1,600 maile; ua huru au râ te mata'i, e i roto i te 16 no te mahana, tapae atura ratou i Mareva. Na te taata haapao fare toa i reira i horoa mai ia ratou i te ahu e te maa, e au no to ratou tere e haere roa mai i Tahiti nei, e ua reva mai nei ratou, e e 11 mahana i muri iho, ua tapae mai ratou i te uahu i Papeete nei, e aita hoi ratou i ino roa i to ratou tere. Ua parau maira te raatira e, aita hoi i ravai te moni i Papeete ia hoo i to ratou faurau iti, e e faaho'ihia taua boti iti ra i Amerika na nia i te pahi auahi.

Te Mau Parau Apî.

NA te hoê taata Farani i faatahuri roa i ta'na pahi reva, a tere ai oia i nia roa; e te na reira pinepine nei oia i teie nei mau mahana ra.

Na te tahi mau taata maohi i te fenua Ausarelia i patia pohe roa i te hoê papaa ravaai i'a, ta ratou ia i inoino atu; e ua faautuahia ratou i te utua pohe.

Ua motomoto na taata e toopiti i roto i te hoê fare teataraa i Ausarelia, e ua pohe roa te tahi no raua. E taata Maori oia no te fenua ra o Niu Zilani.

Na te hoê sotaiete nupepa i tonono i te hoê taata, ia haaati oia i te ao nei mai te taupupu ore. Mai Niu Ioka to'na revaraa'tu, e e 36 mahana, ua tae faahou mai oia i te vahi i haamata'i oia, e ua haaati roa oia i te ao nei. E mea maere rahi roa te reira.

Tera mai te rahi o te mau mutoi i Beritane, oia hoi e 202 raatira rarahi no te mau mutoi, e e mau raatira tauturu e 622, e 1,909 mutoi hi'opoa, e 6,688 tapena pûpû, e e 43,691 mutoi, e e 3,043 mutoi tauturu. Te taatoaraa ia amuihia, e roaa e 56,155 taata.

I te 10 no Atopa, na te Peresideni no te hau Amerika i taumi i te hoê pitopito uira, e na te uira i faaharuru i te paura i ō atu i Panama, e ua pau a'era te patu tapearaa miti i reira ra; e i teie nei e nehenehe ia tomo noa te mau pahi nainai i roto i taua tâpûraa ra. Eiaha tatou e mana'o e, ua oti roa taua ohipa rahi ra i teie nei; ia tae râ i te matahiti apî, ei reira e oti roa'i taua ohipa maere ra.

Ua oti apî i Beritane te hoê pahi manuâ no Iapone, e ua parauhia o te pahi manuâ hau ê i te rahi i te ao nei. Terra mai to'na faito, oia hoi e 27,500 tane.

I te 2 e te 4 no Atopa, ua tupu te hoê aueueraa fenua i Panama, e e rave rahi te mau fare i ino; aita râ te hoê taata i pohe. Aore atoa te tâpûraa i Panama i ino.

Mai te au i te taioraa mahana a te ati Iuda ra, o te 2 no Atopa, o te mahana matamua no te Matahiti Apî. E mai tei au i ta ratou taioraa, o teie nei matahiti o te Fatu ra 1913, o te 5,674 no ratou ra.

Ua roohia e maha vahine i Paris i te ûa. Ua tia noa ratou i raro a'e i te hoê fare umarala, ei paruru i te ûa. Ua anapa mai te uira, e ua pohe roa te hoê, e ua haaparuparuroa-hia e toopiti, e ua ora roa te tahi.

A taoto ai te hoê taata, e 88 to'na matahiti, ua mata-pôhia, e a poipoi ai, ua ara mai oia, e ua maere oia i te maoro o te pô. Ua tia oia i nia, e ua fâfâ imi haere oia i te mati, e ua tamata i te tutui i te mori, ei reira ua ite oia e, ua pô roa to'na mata.

I Buenos Aires, i Amerika Apatoa, ua haapaohia te hoê hi'opoaraa puaatoro, e ua riro te rê matamua i te hoê puaa-toro oni no Amerika. I muri iho i te hi'opoaraa, ua hopate-hia te mau puaa atoa, e te moni i roaa no taua puaatoro oni hoê ra e 80,000 dara moni Amerika.

E ati rahi roa to te hoê oire i fatata i Lonedona, i Beritane, i teie nei tau ava'e. Ua milioni o te mau manu patia, o tei tau mai i nia iho i taua oire ra. I te 26 no Setepa, ua patiahia te hoê vahine, e hui arii oia. E piti to'na patia-raa-hia i nia i te a'i, e e 20 minuti i muri iho, ua pohe roa taua vahine ra.

Ua faatere te hoê taata Farani i ta'na pahi reva (aeroplane) e 9,795 maile i roto i na mahana e 21, e aore roa taua matini ra i ino. Ua noaa ia'na te hoê rê maitai.

Na te hoê taata i faatere i ta'na pahi reva e 180 maile i roto i e 110 minuti. E huru au te reira area mai Papeete, e tae atu i Niau i te Tuamotu.

I te 11 no Atopa a'enei, i Papeete nei, ua pohe roa o Tuporoa i roto i te fare auri, e o to'na ma'i i pohe ai oia, ua taero oia i te ava, i hopoihia'i i te fare auri. To'na poheraa i te pô, mahana maa, i te hora piti i pohe roa'i. E homa, e ohipa ino mau te inuraa i te ava.

I te 11 no Atopa, ua tupu te hoê ati ino rahi; i tua te tupuraa. A tere ai te hoê pahi auahi i ropu i Beritane e Amerika, ua tupu te auahi i nia i taua pahi ra, e aore â e ravea ia tinaihia. Tei nia iho i taua pahi ra e 657 taata, e ua ora e 521 taata, e ua pohe roa e 136 taata ra. I te taime ihora i roohia'i taua pahi ra i te auahi, tei nia ia ratou te hoê vero ino roa, te mata'i, e te miti rahi, e ua pii noa ratou na roto i te parau reva ia tauturuhia ratou; e ua faaroo-hia taua parau reva na ratou ra e te tahi pahi, e 78 maile i te atea, e ua haapeepe taua pahi i te tauturu ia ratou. Ia pô roa faarerei atura ratou, e no te mata'i e te miti, aore i nehenehe i faafatata ia ratou. Poipoi a'era, ua huru mārû te mata'i e te miti, e ua faaorahia te tahi pae taata. I muri iho, ua tae maira e 10 pahi, o tei faaroo i te parau reva no taua pahi i roohia i te ati ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.